

學古堂日

記(一)

新平知

PDG

𠄎

𠄎

𠄎

日

𠄎

光緒十六年冬
錢唐諸
可寶署

光緒二十年冬續刊二十二年夏工竣

學古堂日記序

古語有曰天子大須博覽有曰宰相須用讀書人夫宰相須讀書則文學侍從之臣可知天子須博覽則學校之士可知方今令甲以四書文取士士子總角入塾讀四子書五經畢無不從事於斯夫使五經果精熟自於帖括文有餘而於讀書之實或猶有未盡也吾吳夙稱人文淵藪自乾嘉兩朝上溯國初其成名以去者固已千秋俎豆矣就浚所及見有專精經古而不以科舉爲事者宋刺史翔鳳顧文學廣圻陳徵君奐也有從事科舉之業而兼通經史者吳侍郎鍾駿馮宮詹桂芬也其時未經兵燹郡城藏書諸家尙在有無相通假坊間

多善本有用之書有力者求之卽得老師宿儒未盡亡
學者有所折衷故三十餘年前吳中士風頗不同兵燹
以後非其舊矣大吏知其然也設書局先刊朱子小學
諸書爲學者言行之本十三經廿四史以次告成又搜
集諸家經學小學之書有藏稿未顯於世者刻印流通
其嘉惠後學之意甚盛而寒士限於力者仍難快覩也
前馮宮詹爲正誼院長嘗議及於此故宮詹主講時正
誼書院頗有藏書惜乎一人之力捐書無多未厭學者
之求今方伯貴筑黃公深知寒士得書之難於書院西
偏得隙地而經營之建堂曰學古建藏書樓聚書六萬
餘卷招諸生之有志讀書而無書可讀者資以膏火肄

業其中設日記每日所讀之書有所得有所疑皆記之以俟論定而謬以浚爲之長月終諸生彙錄所記各條呈於學長評是非定甲乙善者獎之不善者糾正之有跡弛不受約束者則屏之法至周也浚之初膺是席也見諸生所讀之書雜亂而無章近於程子所謂玩物喪志乃嚴爲之限首十三經次三史次通鑑說文文選其餘一切姑舍旃諸生中有先入爲主者治書則右蔡傳而左馬鄭治詩則知集傳而以箋疏爲疑怪則又於排比甲乙之中顯示去取俾知漢宋不容軒輊數月之後居然改觀又有四方聞風而至者更多高材傑出至庚寅春夏之交善者益多幾於獎不勝獎矣爰就已丑一

年所取擇明淨有條理者別繕清本呈於方伯付諸梓
人爲學古堂日記第一刻以後卷軸日積諸生功夫亦
日進當有不止於此者後來居上拭目俟之

光緒庚寅仲秋之月吳縣雷浚識時年七十有七

學古堂記

學古堂之建也實維著雍困敦之歲而落成於次年三月時則貴筑黃公來藩於蘇州公好學愛士不厭不倦先以翰林告養日久主蓮池書院講席儲書分課畿輔至今稱道之蒞官後百廢具舉謂浙有詒經精舍粵有學海堂若鄂若湘若巴蜀若豫章無弗有藏書督課之地獨茲大邦闕焉未備甚非誼也於是句覈庫帑得閒款如千緡迺創築室購書之議度地乎可園而基立已可園者水木明瑟庭宇清曠故爲正誼院長涇朱贊善之所居有記見小萬卷齋文集中堂工旣庀次第恢拓初成者書樓五楹顏其堂曰博約中祀高密新安二大

師之位樓儲四部書八萬卷以上至新譯泰西所謂重氣化電諸書非算不明一切悉隸於算學樓之前迤東面池畝許夫渠蔽水爲聽事三楹曰學古堂周以修廊曲達左右巽角爲亭臨水曰一隅堂背小山梅林環之拾級而登其頂眺遠爲樓亭曰浩歌直北開小院爲居室五楹少後於樓樓前迤西有桃杏梅李之屬數十樹編竹爲籬緣池岸以抵於門閤隸庖湑咸得其所是冬合樓右之沈文愨祠址繼爲齋舍三成成五楹取資於前青浦令錢君志澄所捐二千金成之最後爲講堂五楹於齋舍之南而規模始完美會公權巡撫事遂籌巨金二萬兩常存典肆歲取什一之息以供用聘學長雷

深之先生主講席選高材生胡君玉縉章君鉅爲齋長
任典守漸陶之責嗣復拔余及門吳生壽萱爲算學齋
長示有專家察諸生之勤惰而以時攷其言行則委監
院吳校官履剛充之以余爲詁經舊生徒也於訓故詞
章六書九數曾識途徑檄令理董其事又參倣蓮池事
例訂定課程率循罔越開堂踰歲敬業樂羣彬彬可觀
公欣然曰吾之心力已盡節目綱維容多未備惟後賢
善補苴之矣庚寅十月公移藩去未三月而訃來齋長
暨諸生請爲位於北院春秋報祀與西齋祀文愨公相
配代貴筑者今方伯順德鄧公好學愛士過無不及虛
懷下問壹是仍舊貫凡所未備規隨而踵增之厚其膏

火廣其課額諸生愈鼓舞奮興孜孜孟晉選存日記月異而歲不同積久視初刻奚啻倍蓰自章君等捷己丑慶榜後辛卯科胡君亦以優行第一登賢書舉南北榜者都十有三人王君仁俊聯捷成進士選庶常改官銓部累科皆有雋者吳郡言書院之盛於是乎首屈一指則今方伯培植之效也語云莫爲之前雖美弗彰莫爲之後雖盛弗傳於此益信去年余除令崑山秋九月將之官適廣續日記之刻程功過半齋長偕諸生謂余處事七年必留一言以去固請爲之記且曰貴筑公未竟志也余重違同人雅意不獲以不文辭敢述經營締造之因由與夫贊成勿替之本末覩縷如右俾後之覽者

有徵焉若夫師承之臧否德業學術之興衰具詳雷先生日記初刻序中茲不復贅云

光緒二十有二年歲在丙申立秋日錢塘諸可寶謹譔

學古堂日記總目

學長

吳縣雷

浚

選

監院

金山吳履剛

編次

新陽汪之昌

選

長洲顧光昌

長洲章 鉉

齋長元和胡玉縉校

吳縣吳壽萱

周易二種

尚書一種

毛詩九種

周禮一種

儀禮二種

禮記三種

孝經一種

爾雅七種

說文三種

史記二種

漢書四種

通鑑一種

史表三種

文選一種

算學三種

叢鈔六卷

初刻己丑一年續刻庚寅辛卯壬辰癸巳甲午五
年

初刻序跋附後

學古堂日記總目終